

Evangeli ke matla a
Molimo a ho pholosa
mang le mang ea
lumelang.
Ba-Rom. 1:16



Tšabang eo, a nang le
matla a ho lihela
motho liheleng.
Luka 12:5

SESOTHO - Not Fables but Power

E SENG LIPALE, EMPA MATLA !

MATLA A BOLOKANG.

“Hobane ha se ka ho ea ka litšomo tse entsoeng ka mano re le tsebisitseng matla le ho tla ha Jesu Kreste, Morena oa rona, empa e le ka hobane re iponetse boholo ba Hae ka mahlo a rona.” (II Pet. 1:16).

Ba bang batho mohlong ba ka etsa hore re lumele hore Bibe e ngoliloe ka lipale feela tse itseng litaba feela tseo e seng hakakang tsa 'nete tlholehong, ho iqapela feela ha batho hore ba bolele ntho tse se nang 'nete. Empa Petrose Moapostola, o re bolella ka matla le ho tla ha Jesu Kreste, eo ba ileng ba mo bona ha a fetoha mahlong a bona thabeng, ba bona khanya ea Hae, 'me ba utloa lentsoe la Molimo le hlaha lerung le re, “Enoa ke Mora oa ka ea ratoang, eo ke khahlisoang ke eena.” (Matt. 3:17).

Moapostola Pauluse o re bolella hore ha a na lihlolong tsa ho buoa ka Evangeli ea Kreste hobane ke matla a Molimo a bolokang mang le mang ea lumelang, mo-Jode pele le eena mo-Gireke” (Ba-Roma 1:16). Kreste o



MALETSUNYANE FALLS, (630 ft.) Lesotho.

Ke mona moo Masoebe, ngaka e kgolo ya ditaola, a lahlileng matla ahae a boloi, meriana ya bohedene le ditaola ha a se a fumane bophelo bo bocha ho Kreste.

tlile ho pholosa baetsalibe. Ha ho le a mong eo ho ka thoeng o mobe ho feta kapa o lokile hoo a ke keng a mo pholosa. O na le hona ho pholosa ka ho phethahala ba tlang ho Molimo ka Jesu Kreste (Ba-Heberu 7:25). O na le matla a ho pholosa letaoa le masoabing a fetisisang, o pholosa tsotsi, lesholu le ea leshano. O ile a pholosa 'molai, sefapanong. O ile a pholosa seotsoa sa Samaria. O ile a pholosa motho ea neng a kenoe ke meea e litšila oa Gadara, ea neng a e-na le “ligions” tsa bademona. O ile a khalemela leotlatle le neng le befile 'me a pholosa Petrose ha a ne a teba. O ile a pholosa batho ba neng ba le likerekeng ba phahameng joaleka Saule oa Terase ea ileng a fetoha Pauluse ea matla.

Mona Afrika, o pholositse meea e likete-kete. Ba bang e ne e le ba busoang ke litakatso tsa nama ba bang e le mataoa a hloakang thuso banna le basali. Ba bang e le lingaka tse kholo tsa boloi, empa tsa pholoso.

E mong oa bona ea neng a bitsoa Masoebe e ne e le ngaka e kholo ea moloi

nakong ea hae. O ne a tseba ho etsa “Thokolosi”, e leng meea e litšila. O ne a ipolela hore o ne a na le matla a ho nesa pula. E ne e le letaoa le hlokang thuso le motho ea itšoereng hampe haholo, empa ka letsatsi le leng, ha a utloa Evangeli e rutoa a bona kamoo Molimo o neng o folisa ba kulang le liritisa ntle ho moriana, a pholoso ka tsela e makatsang. O ile a khutlela hae maloting a Lesotho. A bokella meriana eohle ea hae, litaola le meriana eohle ka mefuta ea eona a e lahlela a le holimo letsatseng a e lahlela phororong e telele ea 'Maletsunyane, e maoto a 630 ho phahama. A chesa likoae tshole tsa hae le matekoane, a qhala majoala a hae, ka hobane a ne a se a sa ikemisetsa ho hlola a e noa joala kapa ho tsuba koae ea mofota ofe kapa ofe leha e le matekoane. O ile a fetoha a tsejoa e le mo-Kreste oa sebele ke bohle, a tsejoa e le monna oa sebele oa Molimo. Ho ne ho se motho ea neng a ka fetola bophelo ba monna eo ha e se Kreste.

Ke tseba hape mohlankanyana e mong eo e neng e le tsotsi ea sebele. O ne a phela feela ka ho utsoa, ho qhekella le ho tsietsa batho hohle moo a neng a e-ea teng. O ne a phela nako e telelele teronkong ho feta kantle ho teronko. Empa matla a Molimo a ile a pholosa monna eo. Hantle nka re a fetola bophelo bohle ba hae a mo etsa 'moleli oa lentsoe ea makatsang a ruta Evangeli. Ka ho ruta ha hae makholo-khola a litsotsi, le mataoa, masholu le babolai ba ile bapholoso lihlopheng tse ngata tsa batho, barui le mafutsana ba Basoeu le ba Batso.

Matla ona ao a bolokang le 'na a ile a mpholosa lilemong tse ka bang mashome a mahlano tse fetileng, 'me a 'nile a mpaballa ke pholohile lilemo tsena tshole. Matla ao a pholositse bana beso le likhaitsetsi tsaka. A pholositse 'Me ea ratehang. A tla u pholosa hang ka ho panya ha leihlo ha feela u ka lumella Jesu a kena pelong ea hao. Kereke e itseng ha se eona e ka u pholosang. Ha ea ka ea mpholosa empa Jesu a ka pholosa mang le mang ea tlang ho Eena hobane o tlike lefatšeng lena ka oona morero oo.

Likhoeli li se kae tse fetileng re ile ra lula le mohlolohali eo monna oa hae, kamoo ho leng kateng, a phetseng lihlopheng ka lilemo tse fetang mashome a mabeli, a noella lefu a etsa bophelo ba mohats'a hae le bana ho re ba be mahlomoleng. Empa ba 'na ba tsoela pele ho mo rapella 'me Molimo oa fela oa mo lokolla libeng tshole tsa hae. Ha se hore matla a Evangeli a ka pholosa motho a le mong, empa a ka pholosa lelapa lohle, motse ohle le naha eohle. Tsoeletso e kileng ea e-ba 'Wales lilemong tse ka bang mashome a tšeletseng tse fetileng e ile ea pholosa motse ohle 'me ea pholosa England ntoeng. Ho ruta feela ho bonolo ha Jonase ho ile ha pholosa motse o moholo oa Ninive tšenyehong e khola. Molimo o ka pholosa lichaba. O itse: “Sokolohelang ho 'na le bolokehe, lona lipheletso tshole tsa lefatše” (Esaia 45:22). Bibe le libe tsa lefatše li tletse bopaki ba 'nete ba matla a Molimo a pholosang. Ke ka lebaka leo lengeloi le ileng la re ho Josefa, pele Jesu a hlaha: “U tla mo rea lebitso la Jesu, hobane ke eena ea tla pholosa sechaba sa Hae libeng tsa sona” (Matt. 1:21). (Hlokomela hle, hore ho thoe libeng tsa sona e seng

ka har'a libe tsa sona).

MATLA A PHOLISO.

“Ke 'na Jehova mooki oa hao” ho rialo Molimo ho Moshe (Ex. 15:26). Molimo o pakile 'nete ea lentsoe la oona e leng 'nete e ke keng ea rojoa. Ka lilemo tse mashome a mane e ne e le oona feela o phekolang. Ho ne ho se le a mong ea fokolang kapa ea kulang oa batho ba neng ba ka ba 3,00,000. Ho ne ho se ngaka le e'ngoe feela kapa sehlaire seo mohlomong se neng se ka sebelisoa mahareng a bona. E ka sitana leha ba longoa ke linoha ho talima hang feela noheng ea koporo (setšoantšo sa Kreste) ho ne ho ba folisa ba phele. Makhola le likete tsa batho ba phelang kajeno ba ka paka matla a folisang a Morena oa rona Jesu Kreste. MoLepera ea ileng a tla ho Jesu o ile a hloekisoa hanghang. Lifofu tsa boela tsa bona. Limumu le ba tsebe-tutu ba boela ba u tloa 'me ba buoa. Lihlotsa le liritisa tsa tsamaea. Esita le ba shoeleng ba ile ba tsooa ba boela bophelong hape ka tsoho ea matla a Morena oa rona Jesu Kreste. Hoja ho ne ho se matla a folisang Evangeling le lebitsong la Morena Jesu, litaba tsena li ka be li sa ngoloa hobane 'na ke bile haufi le monyako oa lefu ka sebele sa ka, hona ho etsahetse ka makhetlo ke kula haholo, empa ka folisoa ka matla a Lentsoe la Hae. Ka sebele o ipesletse makhopo le mafu a rona sefapanong 'me **ka matetsetso a Hae rea folisoa.**

Ho Lipesalema 103:2, 3 re bala tsena: “Boka Jehova moea oa ka . . . ke eena ea tšoareleng makhopo a hao 'ohle, ea folisang maloetse a hao kaofela.” Jesu mofolisi ea matla, ha a folise feela 'mele o kulang empa o folisa le moea o kulang ke sebele. O folisa moea le pelo e maqeba e robe-hileng. “O hlabolala moea oa ka,” ho rialo Davida. “Ke tla u khutlisetsa bophelo, 'me ke u folise,” re bala tsena ho Jeremia 30:17.

Molimo o entseng motho ka lerole la lefatše o na le hona hape ho re fa bophelo 'me o ka re boloka re phela hantle.

Ha ke sa tla lebala mora oa Morena Lesotho ea ileng a hlaha kotsi e mpe mokokotlong a lihloae ke pere. O ile a shoa ho tloha ka letheke ho ea tsoa menoaneng ea maoto. O ne a ke ke a sisinyeha, ho sisinya maoto a hae, esita le monoana feela oa leoto, 'me a robala ka sanketse ka lilemo tse peli. Ka matla a Evangeli a fumana tšoarello ea libe tshole tsa hae le bophelo bo bocha ho Kreste. E la karabelo ea thapelo o ile a fola hang-hang, a ema ka tumelo 'me a boela a ba le hona ho palama pere ea hae.

Ho folisoa ho ileng ha etsahala ho Madihotetso, moja-lefa Boreneng ba Lesotho bo ruileng ho ile ha sisinya naha eohle. Ka lilemo a senyehile hlooho a fasa ka thata. Ho ne ho se ngaka, ea motho e Mosoeu kapa e Motšo e neng e ka mo thusa. Empa Molimo oa mo lokolla kamor'a ho rapelloa ke e mong oa bahlanka ba ona ba ikokobelitseng.

Nke ke ka lebala Mrs. van Rooyen, mohats'a molemi kapa rapolasie motho ea tumileng oa bohlokoa ho balemi ba Orange Free State ea ileng a kula hampe kamor'a pelei ea ngoana oa hae oa pele. Ka lilemo tse 15 o ne a se a ile a

buuoa ka makhetlo a 24. O ne a tetsoe a lokela ho shoela polasing. O ne a ke ke a sisinya leha a le khopo feela e le ngoe a se a sa utloe a sa bone. Lebitla la hae le ne le se le chekiloe, lekese le se le rekiloe le ba amanang le eena ba se ba rerisitsoe ho tla ho patoeng ha hae. Empa Molimo oa kena oa romela e mong oa bahlanka ba 'ona ho rapela thapelo ea tumelo. Haa ntse a rapela a ama Mareka 16:18. "Ba lumelang . . . ba tla beha matsoho holim'a ba kulang 'me ba TLA fola." Molimo oa ama mosali eo 'me oa mo folisa hartle.

MATLA A MALI A JESU.

Ke ka matla a Mali a Jesu feela lipelo tsa rona li ka hloekisoang libeng tsohle. Ha ho sesepe kapa moriana oa mofota ofe kapa ofe kapa ntho e ka etsoang e ka tlosang sebe. Haeba re re ha re na sebe rea ithetsa, 'me 'nete ha e eo ho rona. Ha re ipolela libe tsa rona Molimo oa tšepaha 'me o lokile ho re tšoarela libe tsa rona, le ho re hloekisa bobeng bohle. Mali a Jesu Krete Mor'a Molimo, a re hloekisa libeng tsohle (1 Johanne 1:7-10). Ho Tšenolo 7:9-17, re bala ka matšoele a maholo ao ho seng motho ea ka a balang a mefuta le merabe eohle, le maleme ohle, ba hlatsoitseng liaparo (lipelo) tsa bona 'me ba li soeufatsa maling a Konyana.

Petrose le Johanne ba re bolella ka matla a pholosang a mali a Jesu, a sa re hloekiseng feela libeng tsa nako e fetileng empa a re pholosang sebeng ka bo sona le mebusong le matleng a sebe. Molimo o re rekile a ithekela rona ka mali a Mora oa oona. Rea tseba hore ha rea pholoso ka gauda le silevera, empa ka mali a bohlokoa a Krete, joaleka mali a konyana e se nang letheba le sekoli (I Petrose 1:18, 19). "U re pholositse ua re tlisa ho Molimo ka mali u re ntša mefuteng eohle le lipuong tsohle le malemeng le bathong le lichabeng 'me u re beile marena le baprista. (Tšenolo 5:6-9).

Mali a Jesu a na le matla a ho re sireletsa matleng a bokhopo a sera. E ne e le mali a konyana a neng a fafatsoa likoseneng tsa matlo a bana, a ileng a sireletsa bana ba Iseraele Egepeta, a ba sireletsa ho timetsoeng ke ea neng a timetsa ea neng a bolaea matsibolo Molimo oa re: "Ha ke bona mali, ke tla feta." (Ex. 12:13). E ne e le mohala ea skareleta o neng o le fensetereng o ileng oa pholosa Rahaba le batho ba habo bohle ha Jeriko e e oa (Joshua 2:18-21). Ka tsela e tšoanang mali a Jesu a na le matla a ho u pholosa uena le ntlo ea hao ha feela u lumela. "Lumela ho Morena Jesu Krete u tla bolokeha, uena le ntlo ea hao." (Liketso 16:30, 31). Batho ba naha e neng e le feela e se na leha e le lifate ea Lesotho ba ne ba fasa malentenyana mekokotlong ea litsunyana tsa bona, mahareng a maphoeo. Ba ne ba tseba hore phakoe e ke ke ea li nka kapa ea leka ho li hapa ha feela li na le malentenyana a mafubelu mekokotlong ea tsona.

Re bala hape ho Tšenolo 12:11 hore bahalaleli ba Molimo ba hlola Satane ka matla a mali a Konyana. Temana e latelang ke 'nete — Ho na le matla, matla, matla a makatsang, maling a bohlokoa a Konyana.

MATLA A THAPELO.

Thapelo ea tumelo le ea khalalelo e na le matla a se nang moeli, thapelo e fetola lintho. Jesu o itse; Kopang 'me le tla fuoa. Molepera eo ho neng ho se ea ka mo thusang, a kopa Jesu hore a mo hloekise — Jesu a fela a etsa. Kapelepele lepera la mo tlohela. Monna oa sefofu a lla ho Jesu a fumana ho bona. Banna ba bane ba ne ba jere ea kulang ke ho shoa litho ba mo tlisa ho Jesu, ba mo kopa hore a mo folise — 'me Jesu a mo folisa. Ho na le meharo ea bophelo e fetang moo le matla a bolokang thapelong a fetang liqhomanane tse itsamaisang tsa sejoale-joale; kapa mefuta e ka etsoang ea qhomane tseo. Thapelo ha e pholose motho ea itseng feela, e ka fetola sechaba sohle.

Elia, eo e neng e le motho ea kang rona, o kile a rapela ka botšepahi hore pula e se ke ea na ka lilemo tse tharo le halofo. A rapela hape eaba pula e theoha leholimong. A boela a rapela thapelo e bonolo ea ba mollo oa theoha o tsoa leholimong oa fihla oa chesa tsohle tsa secheso, patsi, majoe mobu oa hora le metsi. Sechaba sohle sa Iseraele sa busetsoa ho Molimo ka thapelo ea motho a le mong feela. Morena Ezekiasa a rapela ho Molimo ha lira li ne li mo tlela joaleka sekhohola. E le karabelo ea thapelo ea hae, eaba lengeloi le Jehova le otlala masole a lireng a 185,000 moo litente tsa bona li neng li le teng. Jesu a rapela ho fihlela sefahleho sa Hae se fetoha le seaparo sa Hae se soeufala 'me se khanya. O ne a nka masiu a itseng a rapela. O ne a itima lijo a rapela. A rapela ka phehello, a rapela ka boikokobetso ho fihlela ha mofufutso oa Hae o tšoloha, kamoo o neng o etsa marotholi a mali. O ile a loantša sebe, nama le diabolose ka thapelo. O re boleletse ho rapela kamehla.

MATLA A TUMELO LE LERATO.

Jesu o itse haeba re e-na le tumelo e kaalo ka hlaku feela ea mosetareta re ka falatsa lithaba. (Matt. 19:20). Ha ho letho le ka sitang ha tumelo e le teng ho Molimo. Ka tumelo ba ile ba futuhela mebuso, ba fumana ho loka, ba fumana litšepiso, ba koala melomo ea litau ba thethefatsa bohale ba mollo, ba qoba bohale ba sabole, moo ho neng ho fokola ha hlaha matla ba holisa matla lintoeng (Davida le Goliatha), ba tebela makhotla a lira, (Ba-Heberu 11:33, 34). Tumelo ke tlhoho e hlolang lefatše (1 Johanne 5:4).

Leratong leha ho le joalo, re fumana matla a maholo a tšebetso ea Molimo. Lerato le matla joaleka lefu. Le loantša lira tse matla haholo. Re sale baetsalibe, Krete a re shoela 'me re sa le lira ra boelangoa le Molimo ka lefu la Mora oa Hae (Ba-Roma 5:8-10). E ne e le matla a lerato a ileng a etsa hore Molimo o re fe, rona baetsalibe ba lefeela, Mora oa 'ona ea tsoetsoeng a inotši, hore e mong le e mong ea lumelang ho oona a se ke a timela a mpe a be le bophelo bo sa feleng. (Johanne 3:16). Lerato lena la Molimo lea re khothatsa, le re fa matla a ho sebeletsa Molimo, ho bolcka melao ea 'ona, ho ipelesa sefapano sa rona kamehla 'me re o latele. Le tlosa tšabo eohle. Ha ho letho le ka re arohan-

yang le lerato la Kreste. Re feta hole ba futuhelang lira ka Eena ea re ratileng.

Ha se lefu, kapa bophelo, leha e le mangeloi, kapa mebuso le ha e le borena, leha e le matla, leha e le ntho tse teng, kapa lintho tse tla tla, kapa bophahamo kapa botebo, leha e le sebopuo se seng ha ho letho le tla tseba ho re arohanya le lerato la Molimo, le leng ho Jesu Kreste, Morena oa rona (Ba-Roma 8:35-39).

MATLA A HOEHOELANG.

Jesu ke matla a hoeholang ka tsela e makatsang a tlišang batho bohle ho Eena. “Me ’na e tlare hobane ke nyolloe lefatšeng ke tla hulela batho bohle ho ’na,” ho rialo Jesu (Johanne 12:32). Jesu ha a re khanne ka tšabo joaleka Satane, empa Jesu o re atametsa joaleka molisa ea molemo ha a atametsa linku tsa hae. “U nkhole, ’me ke tla phalla kamor’a hao.” (Sefela sa Lifela 1:4). O re qhobela hole le sebe le hole le lefatše hore re mo latele ma khulong a matala le metsing a khutsitseng. Kapele Morena ka bo Eena o tla theoha leholimong ka mohoo, ka lentsoe la arekaengelo, ka tereompeta ea Molimo, ’me ba shoet-seng ho Kreste ba tla tsoha pele, ’me e be moo rona ba phelang ba setseng re tla nyolleloa, ka ho panya ha leihlo, ho khahlanyetsa Morena sebakeng, e be moo re tla bang le Eena ka ho sa feleng (1 Ba-Thess. 4:13-18; 1 Ba-Kor. 15:51-58).

MATLA A HLÓLANG LINTHO.

Pele ho qetello, a nke ke lumelloe ho buoa ka matla a hlólang lintho a Evangeli a etsang ka ho rona sebupoa se secha, a etsang baetsalibe hore e be bahalaleli. Morena Davida o ne a tseba ho hong ka matla oa ha a tla rapela a re “Oho Molimo, u bope ka hare ho ‘na moea o tiileng.” (Ipesalema 51:10). Ho feta tsohle tlhōlo eo a re fumanet-seng eona ho lira tsa Molimo, o ne a ile a fumana hore sera se matla ka ho fetisisa ke se neng se le ka ho eena, pelo ea hae e litšila, e mano le e khopo ka ho fetisisa, ’me ha ho motho ea ka e tsebang (Jer. 17:9). Jesu ka sebele sa Hae o ile a re bolella hore ka hare, pelong tsa batho ke moo ho tsoang mehopollo e mebe, le mafebe, le lipoko, le lipolao le likutso le takatso ea lero, le lonya le thetso, le bohloa le mahlo a talimang hampe, le linyefolo le boikhohomoso le bohlang (Mareka 7:21-23).

Davida o ile a eelloa hore a ka sitoa ho fetola pelo ea hae kapa ho e hloekisa, ka tsela eo a rapela ka botšepi, a le tlasa hlokoafatso e kholo, hore Molimo ea hlolileng leholimo le lefatše, e ka khona le hona a hlole pelo e hloekileng ka ho eena e be o mo fa moea o nepahetseng, Moea o Halalelang. Molima oa arabela thapelo ea hae, hobane hoo ke tšepiso ea Oona, Testamenteng ea Khale. “Ke tla le nea pelo e ncha, ke kenye moea o mocha kahare

ho lona, ke tla tlosa pelo ea lejoe nameng ea lona, ke le nehe pelo ea nama.” (Ezekiele 36:26, 27).

“Ke tla kenya melao ea ka kelellong tsa bona, ke e ngole lipelong tsa bona” (Ba-Heb. 3:10, 11).

Ho ka boleloa lintho tse ngata ka matla a Lentsoe la Hae le phakisang le matla le bileng le leng bohale ho feta sabole e leolitsoeng ka hohle, matla a tsoho ea Hae, boholo bo fetisisang ba matla a Hae, ho rona ke mang ea sa lumeleng lipale tse boleloang empa ho latela matla a Hae a neiloeng ho Kreste, ha a mo tsosa bafung a mo beha letsohong le letona leholimong, holim’a mebuso eohle, le matla le mebuso (Ba-Efese 1:15-21).

Jesu o itse, “Le tla amohela matla ha Moea o Halalelang o se otheohetse ho lona.” Ka matla ona ao Jerusalem eohle e ile ea sinisyeha ka letsatsi la Pentakonta. Matla ao e sa ntse e le ’ona le ka jeno, hobane tšepiso e ka ho lona, le ho bana ba lona, le ho bohle ba saleng hole, esita le ba bangata bao Jehova Molimo oa rona a tla ba bitsa.” (Liketso 1:8; 2:32).

MATLA LEBITSONG LA JESU.

Re ka buoa ka matla a maholo a lebitso la Jesu, e leng lona feela lebitso le neiloeng batho leo re ka pholosoang ka lona (Liketso 4:12).

Ka lebitso la ka, Jesu a rialo, ba tla tebela bademona, ba tla buoa ka lipuo li sele, ba tla beha matsoho holim’a ba kulang, ’me ba tla fola (Mareka 16:17, 18). Tsohle tseo le tla li kopa ka lebitso la ka ke tla le etsetsa tsona. (Johanne 14:13, 14; 15:15; 16:23). Petrose a re ho monna ea neng a hlotsa e sale ho tloha bonyenyane “Ka lebitso la Jesu Kreste oa Nazareth, ema u tsamae,” a tlolela holimo, a tsamae, a tsamae a tlola a rorisa Molimo (Liketso 3:1-9) Ha ho makatse ha a bitsoa Ralimakatso, Moeletsi, Molimo o Matla, Ntate ea sa feleng, Morena oa Khotso, (Esaia 9:6, 7). Molimo o phahamisitse Jesu haholo, eena Jesu eo a kileng as u shoela a ba a shoela le ’na, sefaponong, ’me o mo neile lebitso le kaholimo ho mabitso ohle, “Hore lebitsong la Jesu, mangole ’ohle a ba maholimong le lefatšeng le katlase ho lefatše, a khumame, ’me maleme ohle a bolele hore Jesu Kreste ke Morena, e be tlotliso ea Molimo Ntate.” (Ba-Filipi 2:10, 11), hobane “E kare ha u bolela ka molomo oa hao hobane Jesu ke Morena, ’me u lumela pelong ea hao hobane Molimo o mo tsositse bafung, u tla bolokeha.” (Ba-Roma 10:8-11).

Koba mangole a hao hona joale pel’a Hae ka thapelo lumela ho Eena HONA JOALE e leng Eena ea shoeleng ’me a ba a tsoha sebakeng sa hao ’me u mo bolele pel’a batho le pel’a Molimo pele nako e feta. Mang le mang ea lumelang ho Eena a ke ke a soaba.

Ra-Cheseho.

For free Gospel literature, books and tracts in over 540 languages, write to:

EMAIL: info@angp.co.za

ALL NATIONS GOSPEL PUBLISHERS

P.O. Box 2191, PRETORIA, 0001, R.S.A.

(A Gospel Literature Mission financed by donations)

(Reg. No. 1961/001798/08)